

*Wari enda
si pepulung kolekte extra
guna dana KWK GBKP*



SI MAN OGEN : Kuan-kuanen 10:10-14

T E M A : KOMUNIKASI I BAS JABU

T U J U N : Gelah Moria:

- Meteh maka pengerana kalak bujur desken sumbul kegeluhen.
- Isi jabu melasken kata-kata si payo.

METODE PA : Simulasi (latihen melasken kata-kata si payo i bas keluarga.)

Kata Penaruh.

I bas kalak Karo lit dua antusen kerna jabu. Si pemena eme rumah ingan tading (gedungna). Rumah me ingan kegeluhen, ertina: ingan tading keluarga, ingan cio-cio suari ras berngi, ingan pekesahken kenca erdahin, ingan pulung, ingan kesilang ras ingan mate. Alu kata sideban rumah e ingan cawir metua, ertuah bayak, sangap ras mejuah-juah. (Pdt. DR. E.P. Gintings, adat istiadat mengket rumah, hal. 20). Antusen si peduaken, jabu e eme anggota keluarga, si ngiani rumah; bapa nande ras anak-anak. Kerina anggota jabu e erkawiten sada ras sidebanna. Bapa ras nande erkawiten erkiteken perjabun, bapa ku anak entah nande ku anak erkawiten erkiteken dareh. Kerina anggota jabu e ertanggungjawab mpertahanken keutuhan jabu. Emaka biak si kelengen ras si hamaten lalap perlu isuanken man kerina anggota jabu.

Mpebagesi Pengangkan Kerna Ogen.

Kitab Kuan-kuanen 10 enda secara umum nuriken gambaren kegeluhen hubungan sesekalak jelma si banci icidahken arah ngerana (komunikasi). Hubungan sesekalak jelma i bas erbage-bage kecibal nggeluh, terlebih i bas jabu. Adi si perdiatoken bas ogenta enda lit pengajaren si pentar ras si bodoh bage pe kai ulihna:

Ayat	Pengajaren si pentar	Pengajaren si bodoh
9	Nggeluh bujur, eme seri perukuren ras perbahanen. Kai si lit bas pusuh e ka nge teridah bas perbahanen. Bage pengajaren, bage ka pendalanken. Ulihna aman bas ndalani kegeluhen, la lit kebiaren.	Nggeluh nipu, nokoh, lain kata pedempak lain kata petundal, la seri kata ras perbahanen. Kalak si bage nokoh, mbue taki pacik bas ia. Ajarkenna pe kebujuren adi ia jine la ndalankensa, e bual gelarna. Kalak si bage nggeluh bas kebiaren, sabap mbiar ia tereteh kai si ibahanna.
10	Mandang alu terang-terangen, adi lit perbahanen anggota jabu si salah, pandang alu dem keleng ate, terus terang, alu arapen lit pertobatan ras perdamen.	La pang encidahken kebenaran, nutup mata, nutup babah, situhuna karakter si la payo i bas jabu ras e mpeturah perubaten.
11	Melasken kata-kata si payo arah babahna. Pengeranana erpalas ku	Melasken kata-kata jahat alu babahna guna nutupi

	bas kiniulin, kebujuren, keadilan. Kai si ibelaskenna erguna mereken semangat ras motivasi i bas ndalani kegeluhen.	kebujuren. Perbahanen si bage encedai kegeluhen jelma si enterem.
12	Keleng ate, la naktaki kesalahan. Lit teridah i je hubungan si mehuli, komunikasi si mehuli, amin lit perbahanen si salah bas anggota jabu, labo ipediat kesalahan e, nimai waktu si tepat guna mandangsa. Tapi enggo leben lit pengampunen bas pusuh nari.	Nembah ate mabai perjengilen. Nembah ate biasana radu ras kata-kata bagepe perbahanen si la mehuli. Emaka banci mpeturah perubaten ras lanai si angka i bas jabu.
13	I bas biber kalak pentar lit pengajaren si mehuli. Itehna kai si man katanken sue ras inganna ras ise ia ngerana, katawari ngerana ras katawari la perlu ngerana, itehna kai tujunna ia ngerana.	I bas biber kalak lenge, la lit tujun pengajaren, la lit pemetehna si mehuli guna iajarken. Ukumen man bana eme pengalamen si pagit si labo maba kejuah-juahen.
14	Kalak pentar mpepulung kata-kata si mehuli ras si erguna. Sabap itehna mbelin kal gunana seh ku sinursurna.	Kalak lenge, kata-katana e pe banci meneken dirina ras isi jabuna, sabap la iangkana kai si ibelaskenna.

Bage me Salomo nuriken dua dampar biak si megati teridah i bas kegeluhen manusia. Ulih si apai ateta tergantung ku bas pilihenta. Si pentar entah si bodoh.

Pengkenaina.

Kegeluhen ras kemalemn ate orangtua tergantung man anak-anakna ras sebaliknya, kegeluhen anak-anak tergantung man orangtuana. Teridah maka anak si pentar maba kemalemn ate orang tuana tapi anak si motu erbahan ceda pusuh orangtuana. Pentar entah motu anak e jadi penentu uga perdalanen jabu e ku wari-wari si reh, sabap anak me singaloken tading-tadingen (pewaris) keberlangsungan jabu. Erkiteken si e me maka orang tua rutang mereken pengajaren si mehuli man anak-anakna, gelah anak e jadi kalak pentar. Isingetken i je kerna orang tua, eme bapa ras nande, ngatakensa maka bapa ras nande e bali tanggungjabapna i bas ngajari anak-anak, labo sepihak, tugas nande entah tugas bapa ngenca.

Anak si pentar ras anak si motu tahu-tahu petembil. Anak si motu la erngena ate ku bas pengajaren, nembah atena di kune iajarken, ngena atena perbahanen si la mehuli, jahat perbahanenna, babahna ngerana kerna si la payo, kejahatan e nggo mendarah daging i bas dirina. Anak si bage maba kecedan ate man orang tuana. Anak si pentar labo saja erpemeteh tapi pengkebet geluhna pe mehuli (memiliki moral yang baik). Jadi pemeteh e la terjeng teori, tapi iperaktekkenna bas perbahanen. Ertanggungjawab bas pendahin, njagai kesehatan kula ras pertendin, beluh makeken kiniliten alu payo. Anak si bage maba kemalemn ate man orang tuana. Gelah banci anak e jadi kalak pentar mbelin kal i je ngaruh ras pengajaren bapa ras nande.

Banci si siksiki bas jabunta, pengajaren si apai ngenda megati si lakoken. I bas kita erkomunikasi, kata-kata si kuga ngenda rusur ndarat bas babah ras biberta nari? Pengajaren ras kata-kata si mehuli arah babah, si rehna bas pusuh nari mpeturah keriahen ras kemalemn ate sabap palasna i je kekelengen. Gelah keutuhan jabunta tetap terjaga alu mehuli, perlu kal kerina anggota jabu pentar melasken kata-kata si mehuli, si mereken semangat ndalani kegeluhen. Sue kata ras perbahanen.

Simulasi (latihen):

Arah kasus si teruh enda Moria mperagaken kata-kata si pentar man perbulangen si banci ka jadi pengajaren man anak-anakna.

Kasus

- 1. I bas meja makan, pulung me bapa, nande ras anak-anak ersura-sura gelah man berngi ras-ras. Kenca enggo sikap kerina nakan ras adumna, lit kata-kata si terbelas i bas bapa nari kerna gulen ras bengkau si la bagi ukurna. Merampus ia sabap latih akapna erdahin ndarami nakan teptep wari, tapi ulihna la akapna pas si isikapken ndeharana.

Bapa : *E lalap gulen ras bengkau, la terpan pe. Kita latih naring erdahin e, seh rumah gulen e pe gelah enggo lit saja. La ergizi!* (ibelasken alu merampus)

Nande :

.....
.....
.....

(Isi kata-kata pentar si la erbahan ceda pusuh perbulangen, janah banci jadi pengajaren si mehuli man anak-anak).

- 2. Bas sada keluarga, bapa, nande ras anak-anak nggeluh alu mehuli, rusur arih-arih subuk bas pendahin bagepe persekolahen anak-anak. Usaha keluarga enda erdalan alu mehuli, teridah lit kerjasama si mehuli i bas bapa ras nande. Anak-anakna pe dat juara i bas sekolah. Sekali jadi ngerana me bapa man sekalak pandita si reh ku rumahna erbahan kebaktin keluarga. Iturikenna sura-surana kerna nekolahken anakna ku Amerika jurusen managemen bisnis gelah ia pagi nerusken usahana.

Pandita : *Enggo nge arihkenndu sura-surandu e ras anak-anakndu?*

Bapa : *Anak e me pengajarenta nge gundari nari, kita nge ngaturken ia, buktina gundari pe kerina ia megiken ajar ras juara.*

Nande :

.....
.....
.....

(Tuliskan kata-kata pentar si atendu i belaskenndu man perbulangen ras anak-anak).

Pdt. Nurbety br Ginting,MTh.